

АДАБИЁТШУНОСЛИК АТАМАЛАРИНИНГ ДАВРЛАШТИРИШ

МАСАЛАСИГА ДОИР

Нодира Мирҳайдарова Ҳайитбоевна

Гулистон давлат университети

Ўқитувчи

nodimir7001@gmail.com

Аннотация. Атамашуносликга оид бир қатор асарларда атамага нисбатан қўлланмайдиган "талаблар" унинг ҳақиқий табиатига мос келмаслиги аллақачон исботланган. Терминлар билимнинг ривожланишига мос равишда шаклланадиган ва ўзгарадиган маҳсус, тез ривожланадиган сўз туркумлари сифатида қаралади.

Мақолада замонавий термология таҳлил қилиниб, сўнгти йилларда юз берган ўзгаришлар, терминология соҳасидаги ҳал этилмаган муаммолар ва уларни ҳал этиш йўллари кўрсатиб ўтилган.

Калит сўзлар: атамалар, даврлаштириш, адабиётшунослик тараққиёти, босқичларга бўлиш, атамаларининг мазмун-моҳияти

ВОПРОСЫ ПЕРИОДИЗАЦИИ РАЗВИТИЯ ЛИТЕРАТУРНЫХ ТЕРМИНОВ

Мирҳайдарова Нодира Ҳайитбаевна

Гулистонский государственный университет

преподаватель

Аннотация: В ряде научных работ по терминологии уже доказано, что "требования", которые не применяются к термину, не соответствуют его истинной природе. Термины рассматриваются как особый, быстро развивающийся словарный запас, который формируется и изменяется в соответствии с развитием знаний.

В статье анализируется современная терминология, показаны изменения, произошедшие за последние годы, нерешенные проблемы в области терминологии и их периодизации.

Ключевые слова: термины, периодизация, развитие литературоведения, деление на этапы, значение и сущность терминов.

QUESTIONS OF PERIODIZATION OF DEVELOPMENT OF LITERARY TERMS

Mirhaydarova Nodira Haitbaevna

Gulistan State University

Annotation: A number of scientific papers on terminology have already proved that "requirements" that do not apply to a term do not correspond to its true nature. Terms are considered as a special, rapidly developing vocabulary that is formed and changed in accordance with the development of knowledge.

The article analyzes modern terminology, shows changes that have occurred in recent years, unresolved problems in the field of terminology and their periodization.

Keywords: terminology, periodization, development of literature, the division into stages, the value and nature of terms.

Ҳар қандай ижтимоий фаннинг тараққиёт йўли, энг аввало, тарих билан чамбарчас боғлиқ ҳолда аниқланади. Давр ва босқичларга ажратишнинг ўзига хос мезон ва тамойиллари мавжуд. Шунингдек, жамиятнинг тараққиёт босқичлари, халқнинг ижтимоий-сиёсий, маданий-маърифий ўсиш йўллари, ижтимоий фаннинг тарихи, ўзига хос қонун-қоида ва хусусиятлари воситасида даврлаштирилади. Жумладан, бадиий адабиёт, адабиётшунослик тараққиёти ҳам ана шу хулосалар асосида даврларга, яъни босқичларга бўлинади. Бадиий адабиётнинг методологияси, ижодий методи, услублари, тур ва жанrlари, поэтикаси тарихи ҳам бунга дахлдордир. Даврлаштириш наинки, бадиий адабиётнинг ривожу равнақини босқичма-босқич ўсиш жараёни мезонларини аниқлашда, балки алоҳида олинган даҳо санъаткорлар ижоди йўлинни умумлаштириб, яхлит баҳолашда ҳам жуда қўл келади. Масалан, ҳазрат Алишер Навоийни “ғазал мулкининг сultonи” дейилганда,

ғазал жанрининг тараққиёт босқичлари, унинг ўзига хос хусусиятлари, поэтикаси силсилали таҳлилу талқин қилиш жараёни билан боғлиқ улуғ шоирга шундай буюк рутба нисбат берилган. Шоир ижодигача воқеабанд, пароканда, мусажжа, мусалсал ғазаллар ёзилган ва ривожу равнақ топган. Ҳазрат Навоий эса пароканда ғазалнинг ноқисликларини аниқлаб, якпора ғазални назарий жиҳатдан асослаган. Натижада якпора ғазал турининг асосчиси бўлиб, ғазал мулки тарихидан мустахкам ўрин олган. Улуғ шоир ғазаллари маънан ва шаклан уйғунлиги, маъно тароватининг юксаклиги билан ўзигача бўлган, ўз даври шоирлари ғазалларидан мутлақо ажралиб турди. Ёки темурийлар даврида илм-фан ўзининг тараққиёт даражасига эришган. Бироқ Мирзо Улугбек даври энг чўққиси ҳисобланишга ҳақлидир. “La Figaro” газетасида «Жаҳон тарихидаги буюк саркардалар : Амир Темур» сарлавҳали мақола босилиб, унда Мирзо Улугбек даври ва у қолдирган бой меросни “Мовароуннаҳр тарихининг олтин даври” дея юксак баҳо берилган[5].

Адабиётшунослик атамаларига келсак, унинг ҳам шаклланиши, тараққиёти, такомил даражасига эришиши жамият тарихи, миллий тил, бадиий адабиёт, адабиётшуносликнинг ривожу равнақи билан бевосита узвий боғлиқдир. Шу билан бирга адабиётшунослик атамаларининг ички тараққиёт қонун ва хусусиятлари ҳам унинг ривожланиш даврларини босқичларга бўлишда асосий омиллардан саналади.

Таълим жараёнида адабий таълим етакчи йўналишлардан бири ҳисобланиши шубҳасиз. Бадиий адабиётни ўрганиш билан бирга унинг назарий асослари бинобарин, адабиётшунослик атамаларини ҳам бугунги кун мафкураси нуктаи назаридан ўрганиш ва ўргатиш даврнинг муҳим талабларидан биридир. Адабиётшунослик атамаларининг шаклланиши, манбалари, тараққиёти ва такомили, келажак равнақи ҳақида фикр юритиш учун унинг даврлари, яъни босқичларини ўрганиб чиқиш жўяли самара бериши турган гап. Қардош халқлар адабиётшунослик атамаларининг тараққиёт босқичларини даврлаштирилиши ҳақида маълумотга эга эмасмиз. Аммо ўзбек адабиётшунослик атамаларининг тараққиёт босқичлари

даврлаштирилган. Адабиётшунос Нариман Хотамовнинг “Адабиётшуносликдан қисқача русча-ўзбекча терминологик луғат” китобининг “Адабиётшунослик терминлари тараққиёти тарихидан” номли иккинчи қисмида адабиётшунослик атамалари тараққиётини уч даврга таснифланган. Ҳар бир даврга қатор мисоллар воситасида шарху изоҳ берилган. Бинобарин, адабиётшунослик атамаларининг шаклланиши ва барқарорланишидаги мураккабликлар, қарама-қаршиликлар, хусусан, миллатчи гуруҳларнинг бу борадаги заарли ғоялари ва бунинг олдини олиш учун олиб борилган саъй-ҳаракатлар тўғрисида яхши кузатишлар қилинган. Айни вақтда адабиётшунослик атамаларининг шаклланиши ва ривожланиш йўллари, ўзига хос ички қонуниятларини ҳам ҳисобга олиб, атамаларнинг такомилини уч босқичга таснифланган:

- 1) 1917-1929 йилларни ўз ичига олган давр;
- 2) 30-йиллардан 40 йилларнинг ўрталаригача бўлган давр;
- 3) 40-йилларнинг охирларидан то ҳозирги кунимизгacha (яъни 1970 йилларгача-Н.М.) бўлган давр.

Тасниф ва шарху изоҳлар ўша давр мафкураси асосида берилгани инкор қилиб бўлмас даражада ҳақиқатdir. Биргина атамаларининг шаклланиши ва такомилланиш даврини октябр тўнтарилишидан бошланишининг ўзи қандай ғоявий мафкурага таянилганини аён қиласи. Ҳолбуки октябр тўнтаришисиз ҳам жадид адабиёти мумтоз адабиёт билан миллий уйғониш даври ўзбек адабиёти ва янги ўзбек адабиёти ўртасида эстетик кўприк бўлгани маълум. Жадид адабиёти янги типдаги адабиётнинг методи, жанрлари, услублари, янги тимсол ва поэтик образлари, ҳатто янги атамаларининг тамал тошини кўйишига эришган, энг муҳими, тугилажак янги адабиётнинг мукаммал бўлмаса ҳам эстетик тамойилларини шакллантирган эди. Бошқа «изм»лар ва ғоявий йўналишлар ҳамда давр мафкураси адабиётшунослик атамаларининг шарху изоҳига салбий таъсир кўрсатгани ҳақида гапиришнинг ҳожати ҳам бўлмаса керак.

Дарҳақиқат, янги типдаги адабиёт ва унинг атамаларининг шаклланиши, манбалари сирасида жадид адабиётининг янги хусусият ҳамда тамойиллари,

янги эстетик принциплари таянч бўлгани ҳақиқатдир. Жадид адабиёти эстетикаси мумтоз адабиётининг мадху сано аршидан заминга-ҳаётга, халқ турмушига яқинлаштириди, давр воқелиги унинг тасвир манбаига айланди. Гўё жадидчилик ва жадид адабиёти буржуача йўналишдаги ҳаракат ва адабиёт, деган ғоя хукмрон мафкуранинг сиёсий байроғига айланди. Боз устига араб маданияти ва адабиётнинг таъсири кириб келгунгача моний, буддавий ва шамоний динлари таъсирида шаклланган шеърият ҳамда унинг атамалари, хусусан, араб тили ўрта осиёликлар маданияти ва адабиётнинг хукмрон тили бўлиб фаолият кўрсатгани, унинг ўзбек халқи адабиёти ва маданиятига тасъири ҳақида лом-мим дейиш учун барча “эшик”лар ёпик бўлиб, тилга олиб бўлмас эди. Ана шулар боис ҳам Н.Хотамов адабиётшунослик атамалари тараққиёти босқичининг исломгача, ислом даври, умуман, мумтоз адабиёт даври адабиётшунослик атамалари тараққиётини алоҳида босқичлар сифатида таснифламаган кўринади. Ҳолбуки, ҳар қандай нарса-ходиса, ҳатто наботот олами ҳам ўзининг ибтидоий куртагида сақланиб, ундан униб чиқади, худди шунингдек, адабиётшунослик атамалари ҳам ўзининг замини, негизи миллий тил бойлиги асосида туғилиши ва шаклланиши, наинки ҳаётий тажриба, балки қонунийдир. Ҳеч вақт нарса-ходиса ўзининг ибтидоий куртагисиз йўқ жойдан пайдо бўлган эмас, бўлмайди ҳам.

Қадимги туркий адабиёт даврида адабиётшунослик фани бўлмаса-да, унинг дастлабки атамалари шакллана бошлаган: қўшиқ, йиги қўшиғи, марсум қўшиғи, марсия қўшиғи (ири дейилган-Н.М.), тўртлик шеърлар, мадҳия, талмех, ташбех сифатлаш, мунозара кабилар.

Н.Маллаевнинг дарслигига қўшиклар: меҳнат, қаҳрамонлик, марсия, мавсум, марсум, ишқий-интим, ахлоқий, таълимий турларга таснифланган. Қадимий туркий адабиёт поэтикасини ўрганишда кейинги давр поэтикасида қўлланилган атамалар татбиқ этилади. Бу тажриба жаҳон адабиётшунослигига қабул қилинган. Академик С.П.Лихачёв қадимги рус адабиётини тавсифлашда кейинги даврда қўлланилиб келинган атамалардан фойдаланилган.

Қадимги туркий адабиётида шеър сўзи ўрнида **кўшиқ** атамаси, адабиёт атамаси ўрнида **сўз** атамаси ишлатилган. Аҳмад Югнакий: “Сўзум мунда қилур, борур бу ўзум” деганда адабий мерос “сўз” лексикаси билан аталгани илмда исботланган. Бу даврни адабиётшунослик атамаларининг шаклланиши илк босқичи деб қарааш тўғрироқ бўлади.

Ўзбек адабиётшунослик атамаларининг тараққиётида араб маданияти, адабиёти ва тилининг таъсири кучли бўлгани тарихдан маълум. Туркий халқлар форс тилини давлат тили ва адабий тил сифатида қабул қилгунгача бу вазифани араб тили бажарган.

Араб тили ўша даврда халқаро тил мақомига эга бўлган. Бу жараён Ўрта Осиё маданияти ва адабиётига, хусусан, адабиётшунослик атамаларининг тараққиётига ҳам самарали таъсир кўрсатган ва аникроғи, араб адабиётшунослиги атамалари айнан қўлланилган: **ғазал, мураббаъ, рубойӣ, қасида, маснавий, мусалсал, муҳаммас, абёт, байт, фард, лугз, мусанифот, ашъор** кабилар.

Кейинги асрларда адабиёт дарий тили (форс) давлат тили мақомига эга бўлди. Бу жараён XV асрнинг иккинчи ярмигача давом этди. Адабиётшунослик атамаларида яна фаровонлик юзага келди.

Маснавий, жуфт қофия, чистон, чордевон, ширу шакар, шаҳду ширу шакар, дубайта, адабиётшунос мунаққид каби атамалар кириб келиб, ўзлашди. Қасида, ғазал гарчи араблардан олинган сўз бўлса-да, қадимий туркий адабиётга форс адабиёти орқали кириб келган. Қасида, маснавий Фирдавсийнинг “Шоҳнома”си воситасида “Қутадғу билиг” достонидан ўрин олган. Ғазал Рудакийдан бошланиб, Хоразмий ва Рабғузий ижодида дастлаб пайдо бўлган.

Юқорида айтилганлардан шундай хulosага келиш мумкинки, Шарқ адабиётшунослик атамалари, наинки, ўзбек мумтоз, балки Ўрта Осиё халқлари адабиётига самарали таъсир қилиб, кириб келган атамалар мумтоз адабиётнинг шарху изоҳи ва ифодалаш усулига хизмат қилганини ҳисобга олиб, бу даврни алоҳида босқич сифатида таснифлаш тақозо қилинади.

Мустақиллик ижтимоий-иктисодий, сиёсий жиҳатдангина эмас, балки барча фанлар, айниқса, ижтимоий фанлар соҳасида туб ислоҳотлар, янгилик ва эврилишларни вужудга келтирди. Ижтимоий фанлар мазмуни ва методологиясидаги модюнча қарашдан мутлақо воз кечилди. Унинг ўрнини миллий ғоя ва мафкура эгаллади. Шу маънода фанлар маъно-моҳияти, ғоявий йўналиши истиқлол ғоясидан келиб чиқиб, янгича мазмун касб этди. Бу, энг аввало, ижтимоий фанларнинг ифодачиси - атамаларда содир бўлди. Атама аслида фанни тушунтириш, изоҳлаш “тили”дир. Атамалар тарихи фан тараққиёт йўналишлари, унинг босқичларини белгилаб беришда муҳим омил саналади. Баски шундай экан, мустақиллик даврига келиб, миллий тил давлат тили мақоми даражасига кўтарилди. Бадиий адабиёт ҳукмрон мафкуранинг чиғириклидан тамомила озод бўлиб, эркин тафаккур, “харакатдаги эстетика”га айланди. Адабиётшунослик эса истиқлол ғояси ва мафкураси билан суғорилган бадиий адабиётнинг талқини, таҳлилчисига айланди. Маълум бўладики, мустақиллик даври адабиётшунослик атамаларини алоҳида босқич сифатида таҳлилу талқин қилиш давр талаби. Бу даврда адабиётшунослик атамаларининг мазмун-моҳияти истиқлол мафкурасига кўра ўзгарган босқич ҳисобланиши ўз-ўзидан аён.

Адабиётшунослик атамалари ҳақида юқорида айтилган фикр ва қарашлардан келиб чиқиб, унинг тараққиёт даврини қўйидагича босқичларга таснифлаш тўғрироқ бўлади:

- 1) Илк босқич даври;
- 2) Шарқ адабиётшунослигининг таъсири даври;
- 3) 20-йиллар даври;
- 4) 30 йиллардан 50 йилларгacha бўлган даври;
- 5) 50 йиллардан мустақилликгacha бўлган даври;
- 6) Мустақиллик даври.

Қисқаси, ҳар қандай фан, аниқроғи, ижтимоий фанлар, жумладан, адабиётшунослик атамалари давлат тузуми, жамиятнинг маънавий-маданий тараққиёти, миллий тил бойлиги, бадиий адабиёт ва ниҳоят

адабиётшуносликнинг ривожу равнақи билан узвий боғлиқ ривожланар экан ва унинг даврий босқичлари ҳам шу аснода келиб чиқиш табиийдир.

Библиография:

1. Хотамов Н., Саримсоқов Б., Адабиётшунослик терминларининг изоҳли луғати , -Т.: 1971
2. Хотамов Н. ,Адабиётшунослик терминларига оид, -Т.: 1975
3. Куронов Д., Мамажонов З., Шералиева М., Адабиётшунослик луғати, -Т.:Академнашр,2013.
- 4.Ҳомидий Ҳ., Абдуллаева Ш.., Иброҳимова С., Адабиётшунослик терминлари луғати,Т.,1967
- 5.Халқ сўзи, 2014 йил, 13 август.